

Na osnovu člana IV. 4. a) Ustava Bosne i Hercegovine, Parlamentarna skupština Bosne i Hercegovine, na sjednici Doma naroda, održanoj 26. aprila 2004. godine, i sjednici Predstavničkog doma, održanoj 4. maja 2004. godine, usvojila je:

ZAKON O VAŽNOSTI JAVNIH ISPRAVA U BOSNI I HERCEGOVINI

(Službeni glasnik Bosne i Hercegovine, br. 23/04.)

Član 1.

Ovim zakonom se uređuje važnost svih javnih isprava u pravnom prometu na cijelom teritoriju BiH.

Član 2.

Javne isprave izdane u BiH u svom zaglavlju sadrže pored naziva: Bosna i Hercegovina i naziv izdavatelja javne isprave.

Kad isprave izdaju mjerodavni organi i organizacije entiteta, javne isprave u svom zaglavlju sadrže pored naziva BiH i naziv entiteta.

Član 3.

Pod javnim ispravom, u smislu ovoga zakona, smatra se isprava izdana od mjerodavnih upravnih, sudskih i drugih tijela, institucija, organizacija ili drugih pravnih osoba u vršenju javnih oblasti iz djelokruga BiH, Federacije BiH, Republike Srpske, Brčko Distrikta BiH.

Član 3.

Javne isprave koje su nakon 06.04.1992. godine do dana stupanja na snagu ovoga zakona u propisanom obliku, po tada važećim propisima, izdala mjerodavna tijela, institucije, organizacije ili druge pravne osobe u vršenju javnih ovlasti važe u pravnom prometu na cijelom teritoriju BiH. Ako na izdanoj ispravi ne stoji u zaglavlju naziv: Bosna i Hercegovina, on se može na ispravu naknadno staviti, od mjerodavnog tijela.

Takva javna isprava podobna je za ovjeru i nadovjeru u smislu čl. 8 ovoga zakona.

Član 4.

Ako postoji opravdana sumnja da je javna isprava izdana ili sačinjena oprečno čl. 3. ovoga zakona ili se sumnja da je prema osobi kojoj je javnom ispravom utvrđena kakva obaveza ili uskraćeno kakvo pravo ili povrijeđen pravni interes, pri sastavljanju isprave primjenjena sila, prijetnja ili prevara, utvrđivanje ništavnosti isprave utvrđuje, na prijedlog te osobe ili druge zainteresovane osobe, mjerodavan sud u izvanparničnom postupku u roku od godinu dana od dana stupanja na snagu ovoga zakona.

Član 6.

Javne isprave izdane do 06.04.1992. godine od mjerodavnih tijela bivše SFRJ, mjerodavnih tijela njezinih bivših socijalističkih republika i autonomnih pokrajina važe na cijelom teritoriju BiH, bez bilo kakvih dodatnih ovjera.

Član 7.

Sva tijela uprave, institucije, organizacije i druge pravne osobe u BiH, Federaciji BiH, Republici Srpskoj i Brčko Distriktu BiH dužni su uvažiti javne isprave izdane u skladu sa čl. 2. i 4. ovoga zakona.

Ako je u toku postupak po čl. 5. ovoga zakona, sud koji vodi izvanparnični postupak, do donošenja pravosnažne odluke, može suspendirati korištenje prava iz javne isprave koja je predmet postupka iz čl. 5. ovoga zakona.

Član 8.

Sve javne isprave namjenjene za upotrebu u inostranstvu podležu ovjeri mjerodavnih tijela Federacije BiH, Republike Srpske, Distrikta Brčko BiH i nadovjeri mjerodavnih institucija BiH, u skladu sa odgovarajućim međunarodnim konvencijama i međunarodnim ugovorima koji obavezuju BiH.

Ovjera i nadovjera javne isprave vrši se na zahtjev korisnika javne isprave.

Član 9.

Javne isprave, izdane u drugim državama s kojima BiH ima zaključene međunarodne ugovore, važe u skladu sa tim ugovorima.

Javne isprave, izdane u državama s kojima BiH nema zaključene međunarodne ugovore o prizivanju važnosti javnih isprava, važe ako sadrže sve elemente propisane odgovarajućim međunarodnim konvencijama i pod uslovom reciprociteta čije postojanje utvrđuje ministarstvo pravde BiH na temelju prethodno pribavljenog mišljenja Ministarstva vanjskih poslova BiH.

Član 10.

Ovaj zakon stupa na snagu osmog dana od dana objave u „Službenom glasniku BiH“, a objavit će se u službenim glasicima entiteta i Brčko Distrikta BiH.

PSBiH broj 31/04

4. maja 2004. godine

Sarajevo

Predsjedavajući

Predstavničkog doma

Parlamentarne skupštine BiH

Martin Raguž, s. r.

Predsjedavajući

Doma naroda

Parlamentarne skupštine BiH

Mustafa Pamuk, s. r.
